



Na osnovu člana 22 Statuta Brčko distrikta Bosne i Hercegovine - prečišćeni tekst (Službeni glasnik Brčko distrikta BiH, broj 2/10), Skupština Brčko distrikta Bosne i Hercegovine, na 7. redovnoj sjednici održanoj 28. aprila 2021. godine, usvaja

ZAKON

O DOPUNAMA ZAKONA O PARNIČNOM POSTUPKU BRČKO DISTRIKTA BOSNE I HERCEGOVINE

Član 1

U Zakonu o parničnom postupku Brčko distrikta Bosne i Hercegovine (Službeni glasnik Brčko distrikta Bosne i Hercegovine, broj 28/18), u dijelu trećem pod nazivom „**POSEBNI POSTUPCI**“, iza poglavlja **XXXII**, dodaje se poglavlje **XXXIIa** i članovi **457a, 457b, 457c, 457d, 457e, 457f, 457g i 457h**, koji glase:

„**POGLAVLJE XXXIIa**

POSTUPAK U PARNICAMA POVODOM OSTVARIVANJA PRAVA LICA KOJIMA SU ODREĐENE MJERE U CILJU ZAŠTITE IDENTITETA

Član 457a (Primjena zakona)

Ako u poglavlju XXXIIa ovog zakona ne postoje posebne odredbe, u parnicama povodom ostvarivanja prava lica koja imaju svojstvo svjedoka pod prijetnjom i/ili ugroženih svjedoka, primjenjivat će se ostale odredbe ovog zakona.

Član 457b (Nivo zaštite)

Ukoliko su mjere zaštite stranci kao svjedoku pod prijetnjom i/ili ugroženom svjedoku ranije bile određene u krivičnom postupku, sud će osigurati jednak nivo zaštite i u parničnom postupku.

Član 457c (Sadržaj podnesaka zapisnika i odluka suda)

(1) U parnicama povodom ostvarivanja prava lica koja imaju svojstvo svjedoka pod prijetnjom i/ili ugroženog svjedoka ne primjenjuju se odredbe članova 152 stava 2 tačka e),

311 stava 2 i 72 stava 3 ovog zakona, kojima se određuje obavezan sadržaj tužbe, podnesaka i presuda u smislu navođenja imena i prezimena, prebivališta ili boravišta, te drugih podataka koji otkrivaju identitet tužioca.

(2) U postupcima iz stava 1 ovog člana tužilac se tokom parničnog postupka, uključujući sve podneske, odluke suda, zapisnike i dokumente koji budu korišteni tokom postupka, označava onim pseudonimom koji mu je ranije određen u krivičnom postupku.

Član 457d (Tužba i prilozi)

(1) Tužba za ostvarivanjem prava lica koja imaju svojstvo svjedoka pod prijetnjom i/ili ugroženog svjedoka podnosi se pod pseudonimom ranije određenim u krivičnom postupku.

(2) U prilogu tužbe, u odvojenoj koverti koja je zapečaćena i koju otvara postupajući sudija dostavljaju se rješenja suda kojim su određene i izmijenjene mjere zaštite identiteta, te povjerljiv prilog u kojem su navedeni lični podaci tužioca.

Član 457e (Obavezno zastupanje)

Ako je tužilac u parnici lice koje ima svojstvo svjedoka pod prijetnjom i/ili ugroženog svjedoka, tokom cijelog postupka mora ga zastupati advokat kao punomoćnik.

Član 457f (Primjena zakona u odnosu na umješača)

Odredbe iz ovog poglavlja koje se odnose na tužioca, primjenjuju se i na umješača njegovim stupanjem u parnicu, ako je to lice u toku krivičnog postupka imalo određene mjere zaštite identiteta.

Član 457g (Obaveza čuvanja tajne o podacima)

Svi učesnici u postupku i službene osobe koje u toku obavljanja svojih službenih ili profesionalnih dužnosti, saznaju povjerljive podatke u pogledu identiteta tužioca, uključujući vještaka, imaju obavezu čuvanja tajne o tim podacima, u skladu s odredbama krivičnog zakona.

Član 457h (Primjena zakona u odnosu na svjedoke)

(1) Ukoliko se u toku dokaznog postupka pozivaju kao svjedoci lica koja su takođe u toku krivičnog postupka imala određene mjere zaštite identiteta, sud će od krivičnog suda koji je ranije odredio mjere zaštite identiteta pribaviti rješenje o mjerama zaštite identiteta, te povjerljiv prilog u kojem su navedeni lični podaci svjedoka.

(2) Prilikom izvođenja dokaza saslušanja kao svjedoka lica, kojem je krivični sud odredio mjere zaštite identiteta, sud će takvom svjedoku osigurati jednak nivo zaštite i u parničnom postupku.“

Član 2

(Stupanje na snagu)

Ovaj zakon stupa na snagu osmog dana od dana objavljivanja u Službenom glasniku Brčko distrikta Bosne i Hercegovine.

Broj: 01-02-2001/21
Brčko, 28. 4. 2021. godine

PREDSJEDNIK
SKUPŠTINE BRČKO DISTRIKTA BiH
Mr. sci. Siniša Milić